

佛說大乘戒經

宋西天譯經三藏朝散大夫試鴻臚卿傳法大師施護奉詔譯

如是我聞一時佛在舍衛國祇樹給孤獨園
爾時世尊告苾芻言有破壞戒行壽命者有
斷滅善根者出家難值發精進心堅固守護
若諸苾芻等於佛法中求解脫者^{臨七}遠離一切
諸惡苦惱如佛所說寧捨身命而趣無常不
得縱心犯其戒律若人捨命只壞一生若復
破戒令百萬生沉淪惡道若人持戒當得見
佛戒爲最上莊嚴戒爲最上妙香戒爲勸喜
勝因戒體清淨如清冷水能除熱惱戒法最
大世間呪法龍蛇之毒而不能侵持戒得名
聞持戒獲安樂如是命終時復得生天上佛
言苾芻若犯律儀譬如盲人不見衆色亦如
無足不能行道遠離涅槃不到彼岸若持戒

人成就一切法寶譬如賢瓶圓滿堅固能盛
一切珍寶如是破損珍寶散失若破律儀則
捨一切善法先曾犯戒而後心欲求涅槃如
去眼耳對鏡照面何所堪能佛言苾芻女人
無信不可親近王恩雖勝不可恃怙水沫無
實不可撮摩富貴無常不可久住色相如華
須臾變異壽如熟果不可久停如急流渡船
如朽屋暫住寧食毒藥不得飲酒寧入大火
不得嗜欲佛說是經已時彼苾芻及諸菩薩
皆大歡喜信受奉行

臨七

七

佛說大乘戒經